

明史稿

明史稿

明史藁

列傳第三十九

光祿大夫

經筵講官明史總裁戶部尚書加七級

臣

王鳴緒奉

敕編撰

吳允誠

子管者

薛

斌

子綬弟貴

金

忠

蔣

信

李賢

滕金

順定

吳

成

李

英

從子文

毛勝

焦

禮

毛

忠

和勇

羅秉忠

吳允誠蒙古人名把都帖木兒居甘肅塞外塔溝地官至平章永樂三年與其黨倫都兒灰率妻子及部落五千馬駝萬六千因宋晟來歸帝以蒙古人多同名當賜姓別之尚書劉儵請如洪武故事編爲勘合允誠得賜姓名授右軍都督僉

事倫都兒灰亦賜姓名柴秉誠授後軍都督僉事餘授官賜
冠帶給畜產鈔幣有差使領所部居涼州耕牧晟以招徠功
封西寧侯自是降附者益衆邊境日安由允誠始七年往亦
集乃覘敵擒哈刺等二十餘人進都督同知明年從出塞敗
本雅失里進右都督尋進左都督與中官王安追闊脫赤至
把力河獲之封恭順伯食祿千二百石予世券允誠三子答
蘭管者克勤允誠與二子從軍留其妻及管者居涼州番人
虎保等誘脅允誠衆欲叛去允誠妻與管者謀召部將都指
揮保住卜顏不花等擒其黨誅之帝喜降敕獎之賜纁鈔羊
米甚厚授管者指揮僉事保住等皆有賜韃靼可汗鬼力赤
遇弒其下多潰答蘭與別立哥請出塞自效有功別立哥者

秉誠子也帝征瓦剌允誠父子皆從師還命仍居涼州備邊
允誠卒贈國公諡忠壯命答蘭更名克忠襲其爵再征阿魯
台從行三征阿魯台復從兄弟皆有功洪熙元年以戚里恩
克忠進侯時管者已積功至都指揮同知亦封廣義伯克忠
嘗充副總兵巡邊正統九年統兵出喜峰口征兀良哈有功
加太子太保土木之變克忠與其弟都督克勤子瑾爲後拒
寇突至驟戰不勝敵兵據山上飛矢石如雨官軍死傷略盡
克忠下馬射矢竭猶殺數人與克勤俱歿於陣贈邠國公諡
忠勇克勤贈遵化伯諡僖敏瑾被執逃歸嗣侯英宗嘗欲使
瑾守甘肅辭曰臣塞外人若用臣守邊恐外裔輕中國帝善
其言乃止曹欽反瑾與從弟琮聞變椎長安門上告門閉欽

攻不得入遂縱火瑾將五六騎與欽力戰死贈涼國公諡忠壯予世券三傳至曾孫繼爵嘗守備南京傳子汝循孫惟英與繼爵皆總督京營戎政崇禎末都城陷汝循弟勲衛汝徵偕妻女投繯死管者卒子玘嗣管者妻早奴亦有智略嘗親入朝獻良馬朝廷多其忠玘卒管者弟克勤子琮嗣鎮守寧夏成化四年滿四反琮坐激變且臨陣先退下獄論死謫戍邊爵除

薛斌蒙古人本名脫歡父薛台洪武中歸附賜姓薛累官燕山右護衛指揮僉事斌嗣職從起兵累遷都督僉事從北征有功進同知永樂十八年封永順伯祿九百石世指揮使斌卒子壽童方五歲從父貴引見仁宗立命嗣伯賜名綬長驍

勇善戰正統十四年秋與成國公朱勇等遇寇於鷓兒嶺軍
敗弦斷矢盡猶持空弓擊賊賊怒支解之既而知其本蒙古
人也曰此吾同類宜勇健若此相與哭之謚武毅子輔孫勲
竝得嗣伯勲子璽乃嗣指揮使如劬文貴本名脫火赤斌之
弟以舍人從燕王起兵屢脫王於險積官都指揮使再從北
征進都督僉事永樂二十二年封安順伯祿九百石宣德元
年進侯加祿三百石子世劬卒贈濱國公謚忠勇無子從子
山嗣爲指揮使天順改元以復辟恩命山子忠嗣伯卒子瑤
嗣弘治中卒子昂降襲指揮使

金忠者蒙古王子也先土干也素桀黠爲阿魯吉所忌永樂
二十一年成祖親征漠北至上莊堡率妻子部屬來降時六

師深入寇已遠遁帝方恥無功見其來歸大喜賜姓名封忠順王賜冠帶織金襲衣命坐列侯下輟御前珍羞賜之復賜金銀寶器忠大喜過望班師在道忠騎從數問寇中事眷寵日隆明年忠請爲前鋒討阿魯台自效帝初不許會大同開平警報至諸將請從忠言帝復出塞忠與陳懋爲前鋒而阿魯台聞王師復出倉皇渡答蘭納木兒河遁去忠懋至河不見寇抵白邨山卒無所遇乃班師仁宗嗣位加太子太保竝支二俸宣德三年親征兀良哈敗寇於寬河忠與把台請自效帝許之或言不可遣帝曰去留任所欲耳朕有天下獨少此二人邪已二人獲數十人馬牛數百來獻帝喜命中官酌以金卮遂賜之明年加太保六年秋卒命有司治喪葬把台

者忠之甥從忠來降授都督僉事宣德初賜姓名蔣信正統中封忠勇伯從駕陷土木也先使隸賽罕王帳下信雖居朔漠志常在中國每詣上皇所慟哭擁衛頗至己竟從駕還詔復給其祿景泰五年卒贈侯諡僖順子也兒索忽襲爵天順初更名善弘治中卒無子爵絕

李賢初名丑驢韃靼人元工部尚書洪武二十一年來歸通譯書太祖賜姓名授燕府紀善侍燕世子最恭謹靖難師起有勞績累遷都指揮同知凡塞外表奏及朝廷所降詔敕皆命賢譯賢亦屢陳所見成祖皆採納之仁宗卽位念舊勞進後軍都督僉事賜資甚渥尋召見憫其病封忠勤伯食祿千一百石尋卒

滕定父瓚住元樞密知院洪武中來降授會州衛指揮僉事
賜姓滕從燕起兵進燕山右衛指揮使卒定嗣官屢從出塞
有功進至都督僉事宜德四年封奉化伯祿八百石正統初
卒子福嗣爲指揮使

金順本名阿魯哥失里永樂中來降授大寧都指揮僉事從
敗本雅失里又敗阿魯台累進都督僉事宜德三年從巡北
邊有斬捕功明年封順義伯祿八百石卒子忠嗣爲指揮僉
事

吳成遼陽人初名買驢父通伯元遼陽行省右丞太祖時觀
童來降通伯父子與俱買驢更今姓名充總旗數從大軍出
塞建文元年授永平衛百戶降燕從戰皆有功三遷都指揮

僉事始知名南軍聞吳買驢名多於陣上指目之設伏淝河
進兵小河合戰齊眉山攻敗靈璧軍皆殊死鬪功多成祖卽
位授都指揮使從征本雅失里疾戰本雅失里以七騎遁從
征阿魯台合朱榮兵爲前鋒追至闊灣海召還進都督僉事
又三從出塞洪熙元年進左都督從陽武侯薛祿征大松嶺
爲前鋒有功增祿米宣宗初以成嘗宿衛東宮錄舊勞封清
平伯祿千一百石予世券漢庶人反復與陽武侯祿爲前鋒
事定出守備興和成好畋獵而不修武備寇伺其出獵卒入
城掠其妻孥以去帝聞之置不罪已而阿魯台入貢還其家
口三年帝北征從敗賊於寬河進侯祿如故八年卒贈渠國
公諡壯勇士忠前死忠子英嗣伯卒子璽嗣坐貪淫奪爵久

乃復之卒無子從弟琮嗣四傳至元孫遵用崇禎末京師陷被殺

李英西番人父南哥洪武中率衆歸附授西寧州同知累功進西寧衛指揮僉事英嗣官永樂十年番酋老的罕叛英擊之討來川俘斬三百六十人夜雪賊遁追盡獲之進都指揮僉事番僧張答里麻者通譯書成祖授以左覺義居西寧恣甚以計取西番貢使貲納通逃交通外域肆惡十餘年英發其事磔死籍其家西陲快之末年中官喬來喜鄧成等使西域道安定曲先遇賊見殺掠所齎金幣仁宗璽書諭赤斤罕東及安定曲先詰賊主名而敕英與土官指揮康壽等進討英訥知安定指揮哈三孫散哥曲先指揮散卽思實殺使者

遂率兵西入賊驚走追擊踰崑崙山深入數百里至雅令闊
與安定賊遇大敗之俘斬千一百餘人獲馬牛雜畜十四萬
曲先賊聞風遠遁安定王桑爾加失夾等懼詣闕謝罪宣宗
嘉英功遣使褒諭宴勞之令馳驛入朝既至擢右府左都督
賜賚加等宣德二年封會寧伯祿千一百石并封南哥如子
爵英恃功而驕所爲多不法寧夏總兵官史昭奏英父子有
異志南哥上章辯賜敕慰諭之英家西寧招逋逃七百餘戶
置莊墾田豪奪人產復爲兵部及言官所劾帝宥英追逃者
入官七年西寧指揮祁震子成當襲父職庶兄監藏英甥也
欲奪之成從祖太平攜成赴京辯英遣人篡取太平及其義
兒杖之義兒竟死言官交劾并及前罪遂下英詔獄奪爵論

死正統二年始釋後稍給其祿尋卒英宗復辟官其子杲錦衣指揮同知尋進都指揮使用薦擢左軍都督僉事屢分其營務以嚴愼稱英從子文宣德間爲陝西行都司都指揮僉事西番思俄可嘗盜他部善馬都指揮穆肅求不得會思俄可以畜產鬻於邊肅誣以盜收掠致死番人惶駭思亂文劾之逮肅下吏西陲以寧累官都指揮使天順元年冒迎駕功進都督僉事未幾以右都督出鎮大同寇二千餘騎犯威遠文率師敗之封高陽伯石亨敗革奪門冒功者官文自首帝以守邊不問四年秋亨來大舉入寇文按兵不戰遂入鴈門大掠忻代諸州京師震恐寇退徵下詔獄論斬帝宥文死降都督僉事立功延綏旣而進都督同知成化中哈密爲土魯

番所併求救於朝詔文與右通政劉文往甘肅經略之無功而還弘治初卒正德初贈高陽伯

毛勝字用欽初名福壽元右丞相伯卜花之孫伯父那海洪武中歸附以靖難功至都指揮同知無子勝父安太嗣爲羽林指揮使傳子濟無子勝嗣論濟征北功進都指揮使嘗逃歸塞外尋復自還正統七年以征麓川功擢都督僉事靖遠伯王驥請選在京番將舍人捕苗雲南乃命勝與都督冉保統六百人往已再征麓川卽命二人充左右參將賊平進都督同知十四年夏也先謀入寇勝偕平鄉伯陳懷等率京軍三萬鎮大同懷遇寇戰歿勝脫還以武清伯石亨薦景帝進勝左都督督三千營操練貴州苗大擾詔勝往討未行而也

先逼京師勝禦之彰義門北擊退之越二日引兵西直門外
解都督孫鏜圍明日都督武興戰歿於彰義門寇乘勝進勝
與都御史王竑急援之寇遂引却勝追襲至紫荆關頗有斬
獲事定乃命以左副總兵統河間東昌降夷赴貴州賊首韋
同烈據香鑪山作亂勝與總兵梁珣右副總兵方瑛等從總
督王來分道夾擊勝進自重安江大破之會師山下環四面
攻之賊窘縛同烈降還討湖廣巴馬諸處反賊克二十餘寨
擒賊首吳奉先等百四十人斬首千餘級封南寧伯于世券
疏請更名從之移鎮騰衝金齒芒市長官刀放革潛結麓川
遺孽思卜發爲變勝設策擒之巡按御史牟俸劾其貪暴不
法數十事且言勝本降人狡猾難制今又數通外夷恐貽邊

患詔巡撫覆實卒置不問天順初卒贈侯諡莊毅子榮嗣坐石亨黨發廣西立功成化初鎮貴州尋移兩廣卒子文嗣弘治初協守南京傳爵至明亡乃絕

焦禮字尚節蒙古人父把思台洪武中歸附爲通州衛指揮僉事子勝嗣傳至義榮無子以勝弟謙嗣累功至都指揮同知卒子管失奴幼謙弟禮借襲其職備禦遼東宣德初禮當還職宣宗念禮守邊勞命居職如故別授管失奴指揮使禮尋以年勞累進都指揮同知正統中積功至右都督英宗北狩景帝命充左副總兵守寧遠未幾也先逼京城詔禮率師入衛寇退還鎮景泰四年賊二千餘騎犯興水堡禮擊走之璽書獎勵進左都督英宗復辟以禮守邊有功召入覲封東